


越備史

二之四

坤



			五	漢
		三	一	書
	二	九	九	門
冊	架	函	號	類

庫文閣内			
三	五	漢	
函	一	書	
二	三	九	
架	冊	號	類

内閣文庫		
番號	漢	5139
冊數	2	( 2 )
函號	290	156



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



吳越備史卷之二

宋錢儼撰

清席世臣訂

文穆王

文穆王諱元瓘字明寶武肅王第七子也母晉國昭懿太夫人陳氏唐光啓三年丁未冬十一月十有二日生於杭州之東院先是有胡僧持一玉羊大可數寸光彩異以獻武肅王且曰得此當生貴子王果以丁未生焉乾寧元年二月授鹽鐵發運巡官奏授金部郎中賜金紫天復元年八月改授禮部尚書遙領邵州刺

史九月壬子王祖妣秦國太夫人水邱氏薨二年徐  
綰許再思構宣城觀察使田頴同劊我壘頴敗率徐  
綰許再思回宣州盧我師逐之乃懇質武肅王王歷  
選諸子不應命時王尙幼請行莊穆夫人聞之泣曰  
置我兒於虎口也王曰亡身以紓國家之難亦足以  
報劬勞耳雖死無恨乃再拜而出武肅王奇而送之  
王自北門躡繩梯而下以赴頴營初頴附於淮人及  
還宣城而頴叛淮帥會我師以攻之頴每戰不勝歸  
必求王將肆其毒頴母老且賢常加保護天祐元年  
十月我師與淮人攻之甚急頴將出戰乃曰今日不

勝必殺錢郎其母目而送之且曰鼠輩死不旋踵矣  
是日果陷於宛水橋爲亂兵所殺賊眾尙擾我師提  
頴首以示之賊眾遁散頴母遂奉王歸我師衛而歸  
焉二年春正月制授王檢校右僕射八月處州刺史  
盧約弟佶寇永嘉開平元年正月武肅王命王救永  
嘉四月斬盧佶而還時盧佶列巨舟四十艘於清海  
門以邀我師王謂諸將曰賊之  
銳卒盡在此矣宜勿與戰當有他道徑襲賊壘出其  
不意必成禽也於是安固江登陸而襲之佶由是  
就師還承制改王衙內都指揮使檢校尙書右僕射  
冬十月授王金紫光祿大夫檢校司空五年秋七月  
賜號王贊正安國功臣進授司徒守湖州刺史乾化

三年夏四月淮將前吉州刺史李濤率兵二萬自千  
 秋嶺寇我衣錦軍武肅王命王率師討之王以山谷  
 迂僻乃盡伐樹木絕其歸路為三覆以待之時江南  
 國主徐知誥在賊中與王騎相逼僅獲之俄而知誥  
 易服乘白騾而竄壬辰獲李濤及偏將咸知進等八  
 千餘人兵甲生口稱是是行也王營中有氣如龍虎  
之氣五月王復率騎兵攻宣州廣德縣城未拔有登  
 城詬辱我師王怒奮擊之六月己卯城陷王手刃二  
 百餘人藉藁而行獲將花虔渦信及吏卒七十餘人  
 殺戮凡二萬四千而還先是有日省視王曰公手刃  
 百人當大貴時又有僧名自

新常衣紙住廣德山院王至眾皆遁而自新歸然晏  
 坐軍中有詰其不去者自新曰前後左右皆兵耳去  
 將安適時王在眾中自新忽見之乃斂衣奉迎與語  
 久之及王還遂載而歸後王問自新當時何以見識  
 自新曰微僧無他術但觀王在萬眾中骨法獨冬十  
 異與咸通皇帝御容頗相類故爾幸得一識也  
 月敕授王檢校太保依前湖州刺史大彭縣開國男  
 食邑三百戶四年夏六月制授王特進光祿大夫開  
 國侯食邑一千戶秋九月王率師攻常州無錫縣丁  
 未克之獲其將朱超等五百餘人而還貞明元年春  
 正月敕授王鎮海軍節度使土客諸軍都指揮使湖  
 州刺史如故三年夏六月制加王檢校太傅增食邑  
 五百戶五年夏四月王率水師大小戰艦五百餘艘

皆刻龍形自東州發艦徑伐淮甸時淮南遣將彭彥章陳汾等大戰於狼山江將戰之夕王召指揮使張從實計之曰彼若徑下當避其初以誘之制勝之道也乃命軍中宿理帆檣每舟必載石灰黑豆紅砂以隨焉翊日昧爽淮人果乘風自西北而下危檣巨艦勢若雲合我師皆避之賊舟既高且巨不能復上我師反乘風以逐之復用小舟圍其左右賊迴舟而鬪因揚石灰賊不能視及軸轆相接乃撒豆於賊舟我舟則砂焉戰血既漬踐豆者靡不顛踣命進火油焚之

火油得之海南大食國以鐵筒發之水沃其焰彌盛武肅王以銀飾其筒口脫為賊中所得必剝銀

而棄其筒則火油不為賊所有也

斬其將百勝軍使彭彥章

一作擧獲

士卒七千餘人賊船四百餘艘餘皆焚之其斬馘之

甚自江及岸數十里皆殷焉淮帥自是遂求通聘

王之

是行也舟次狼山江之石脾灣有石幢大署其文曰向後有木龍五百至此此真聖其勝也 秋七

月王復戰於毘陵之無錫縣偏將會雲奔於賊我師

不利王騎逼高岸賊將追及乃舉策私誓曰天必助

我馬當躍上不然則墜我於此馬果一躍而登岸既

而復整行伍破賊而還冬十一月丁亥王妣吳越國

莊穆夫人薨六年冬十月敕遣衛尉卿兼通事舍人

陳琮授王檢校太傅同中書門下平章事充清海軍

節度使餘如故龍德二年春正月敕授王特進檢校  
 太尉兼侍中加食邑三百戶仍賜匡扶定亂立正至  
 道功臣同光二年冬十月制授王開府儀同三司檢  
 校太師兼中書令依前清海軍節度使兼充兩浙節  
 度使觀察畱後遣進奉使婁輯將命焉天成元年四  
 月武肅王不康因如衣錦軍命王監國仍俾便宜從  
 事武肅王至白衣錦軍而中外無所專命武肅王嘉  
 嘆久之九月制加王食邑一千戶實封一百戶一夕  
 神人賁骨一副易  
 王頂及醒尚痛焉三年春二月遣閣門通事舍人李  
 韞授王鎮海鎮東等軍節度使杭州越州大都督長

史加食邑一千戶實封二百戶秋七月己巳忠獻王

生初武肅王將屬王以冢嗣乃命諸子有功者數人  
 謂曰爾無隱情各言爾功以定厥後王兄中吳軍

節度使元璩王弟清海軍節度使元璿璿國軍節度  
 使傳璟洎諸公子等皆上言王功德高茂是宜委副

故以兩鎮屬焉及武肅寢疾一日命出玉帶五賜王  
 兄弟命王先擇之王乃取其狹小者武肅王大悅謂

王曰我有汝瞑目無恨矣四年秋八月己酉今大元帥吳越國王

宏俶生五年夏五月制加王食邑一千戶實封一百

戶郊恩也長興三年春三月己酉大雪二十八日庚

戌武肅王薨王哀痛終日四日不食左右勸以粥夏

四月己未王即位悉用藩服之儀從治命也赦境內  
 凡一應荒絕田產尚隸租籍者悉免之中外頒賚有

差自今年孟春泊是月陰晦彌日及王親事之日至是澄霽中外咸悅是月庚午奉武

肅王靈輜殯於衣錦軍之正寢秋八月楚帥馬希聲

殂弟希範嗣

癸巳四年春正月福州王延均僭稱帝更名璘三月敕

遣將作監李錯光祿少卿張哀來歸我先王之賵又

遣引進使楊彥珣授王起復雲麾將軍上金吾衛大

將軍員外置同正員王兄中吳軍節度使元璪檢校

太師兼中書令王弟清海軍節度使元璿檢校太傅

同中書門下平章事餘如故夏四月淮南僞客省使

許確百濟國太僕卿李仁旭各來祭我先王秋七月

敕遣郎中張絢授王中書令進封為吳王是月番禺

僞左僕射何瑱亦來祭我先王九月敕遣侍郎張文

寶來宣諭文寶泛海而來被風壞船飄至天長吳主厚禮之及賞從者錢帛等數萬文寶獨受

飲食餘皆辭之吳主嘉之竟抵杭冬十一月明宗崩宋王從厚即位

是為閔帝十二月庚戌邕國軍節度使同平章事檢

校太傅王兄元璣卒璣王之庶兄也母慶安夫人胡氏公性氣寬厚沉靜寡言多尚

儒釋不喜奢侈歷官數年黎庶安樂早失夫人終不再娶嗣乏是歲順化軍節度使

判明州王兄元珣召歸錢塘懲虐政也

甲午應順元年春正月閔帝改元大赦敕遣鞍轡庫使

王延縞來宣告仍賜國信尋又遣散騎常侍孔昭序

吳越傳 卷二 六 掃葉山房

駕部員外郎張縉冊王爲吳越王是月大雪平地五尺壬午奉葬先王於茅山閏月蜀帥孟知祥僭稱大蜀皇帝年號明德夏四月潞王從珂率兵入洛逐閔帝而自立改元清泰六月敕遣給事中張延雍兵部員外郎馬義冊王爲吳越王秋七月僞蜀孟知祥殂子景嗣

乙未清泰二年春三月制授靜海軍節度使檢校太保中書令王弟元球守太師秋七月甲辰西方慶雲見重建開元宮追福於先王也

丙申三年春正月敕遣禮部尙書李懌戶部郎中姚遐

齋奉吳越王金印至歸舊物也秋七月敕建先王廟於東府是月制授王部將保順軍節度使鮑君福檢校太尉同平章事冬十月僞閩王景殺其父延均而自立年號通文十一月契丹立石敬瑭爲晉皇帝於洛大赦改元天福潞王自殺十二月敕授王天下兵馬副元帥

丁酉天福二年春正月朔日有蝕之敕遣供奉官周彥環賜國信二月淮南以徐知誥爲齊王建國於金陵是月己酉夜暴雨自西北起連日至壬子有海魚二尾各長五十餘尺一死於桐廬一死於餘姚江三月



靜海軍節度使王弟元球順化軍節度使王弟元珣  
 竝有罪命死王許以公禮葬其麾下卒伍悉宥之元球  
 元珣數有軍功先王賜有兵仗及王立元球等恃恩  
 驕橫增置兵仗諸將吏告元球遣親信禱神求主吳  
 越又為蠟丸與元珣議謀王不信諸將復告王乃召  
 元球元珣宴後宮既至左右告元球等有刃懷於袖  
 即皆格殺之王欲按諸將之交通者姪仁俊諫曰昔  
 光武破王郎曹公破袁紹皆焚其書疏以安反側宜  
 免之王夏四月敕遣禮部尚書程遜兵部員外郎韋  
 乃止  
 稅封王為吳越國王仍賜天下兵馬副元帥金印一  
 面甲午王即位建國之儀一如同光故事仍赦境內  
 今年租稅之半是月晉主遷都於汴秋七月制削元  
 球元珣狂身官爵任便處置八月辛巳王大閱於北

郊是月偽吳楊氏遜位於徐知誥戊申王新建五廟  
 於城南九月乙卯王親祀五廟冬十一月乙丑金陵  
 徐知誥僭稱大齊皇帝年號昇元

戊三年春正月朔日有蝕之二月乙亥吳越國丞相  
 沈崧卒贈諡文獻崧名字吉甫閩人也祖輅大理評  
 生時有大蛇墜牀前引首視之久而方去既七日將  
 浴忽風雨震壞浴盆乾寧二年刑部尚書崔凝主禮  
 闈凡二十五人登進士第滄濫尤眾昭宗御武德殿  
 命翰林學士陸展祕書監馮渥親覆試凡落十人昇  
 日崧再以章奏捷尋歸宦途由淮甸淮帥辟之不就  
 遂歸武肅歷鎮海軍掌書記授浙西營田副使奏授  
 祕書監檢校兵部尚書右僕射凡書檄表奏多崧所  
 出莊宗即位改元同光武肅王問其祚脩短崧曰觀  
 此號為國不成止一口耳文穆王襲位置擇能院冬  
 以選士俾崧主之國建拜崧丞相終年七十六歲

十一月敕遣尚書左丞王延司門郎中張守素齋捧  
吳越國王玉冊及沿身法物等至

冊曰維天福三年歲次戊戌十一月甲辰朔五日  
戊申皇帝若曰王者握圖立極崇德報功或開國  
以建邦或苴茅而襲爵乃樹藩屏式獎忠勳古先  
哲王率由斯道唯朕薄德敢忽彝章况夫奠南服  
之輿區鎮東甌之重地懋績雖高於列土殊榮未  
繼於肯堂得不申加等之恩降非常之命用紀代  
天之業特頒鏤玉之文乃擇吉辰爰敷盛典咨爾  
興邦保運崇德志道功臣天下兵馬副元帥鎮海

鎮東等軍節度浙江東西等道管內觀察處置兼  
兩浙鹽鐵制置發運營田等使開府儀同三司檢  
校太師守中書令杭州越州大都督府長史上柱  
國吳越國王食邑一萬五千戶實封一千五百戶  
錢元灌嶽靈稟粹天象儲精蘊文武之兼才受乾  
坤之閒氣旣寵承吳越功邁桓文運妙略以平寇  
用奇兵而制變祇嗣基構表率英雄淮夷之屏氣  
銷聲海嶠之波澄浪息而況興我昌運竭乃忠規  
懋勳庸而首列韓壇奉玉帛而誠先禹貢語尊獎  
則獨標大節顧封崇則未稱鴻名宜舉徽章俾奉

先正矧其天文當南斗之分地志控勾踐之都眷  
 茲舊封允屬全德是用異車服於羣后盛簡冊於  
 列藩正二國之土疆錫九天之寶瑞表予嘉命纘  
 乃舊邦大振家聲爽輔王室今遣使大中大夫尚  
 書右丞上柱國賜紫金魚袋王延使副中散大夫  
 尚書司門郎中柱國賜紫金魚袋張守素持節備  
 禮冊爾為吳越國王於戲服袞衣而佩紵玉位壓  
 於諸侯駕戎輅而握兵符名尊於九代馭貴之重  
 象賢之榮爾其祗荷天光勉清國步往綏厥位永  
 孚於休戒之慎之勿忝前烈

十二月王大閱馬步軍泊樓船於碧波亭

己亥四年春二月敕授世子宏傳為果州團練使是月

偽齊徐知誥改姓李更名昇僭稱大唐

昇本潘氏湖州安吉縣人

父為安吉砦將嘗因淮將李神福侵我吳興擄潘氏而去昇遂為神福家奴徐溫嘗造神福家見而異之求為養子至是乃隱本族而冒徐姓焉後嘗致書於我以毘陵求易吳興仍引祊田為說則本潘氏明矣

秋七月朔日有蝕之閩王延義更名曦殺其主景而

自立年號永隆八月戊申王建世子府於城北是日

白龍見處州長松縣遂更為龍泉縣是月敕遣刑部

尚書季懌禮部郎中崔鈞授王天下兵馬元帥增食

邑五千戶實封五百戶仍賜御服紅羅真珠戰袍金

鎮甲各一副九月詔陞婺州為武勝軍授王兄元懿為節度使是月保大軍節度使同參相府事隆仁章

卒冬十月壬子吳越國莊睦夫人馬氏薨

夫人臨安人父綽淮

浙行軍司馬雄武軍節度使同平章事馬綽之妻夫人性聰慧勤於職初武肅王禁中外母得蓄聲妓夫人以王後嗣未立乃請於武肅王王嘉之曰我家宗祀幸汝得主之矣因而許王納妾遂生忠獻王諸子既長夫人皆均養之常置銀鹿於帳前坐諸公子於上夫人閱其聚戲喜動顏色初封越國至吳越國夫人薨年五十歲敕諡曰恭穆十二月辛酉葬恭穆夫人於衣

錦軍慶仙鄉

子庚五年春二月甲辰溫州刺史王子宏僕卒是月閩

王曦遣兵擊其弟王延政於建州遂僭稱大殷皇帝

王命衙內統軍使仰詮都監使薛萬忠帥師救建州

三月又陞嘉興縣為秀州以嘉興崇德華亭三縣隸

焉是月敕遣右諫議大夫高延賞兵部郎中李元龜

授王天下兵馬都元帥夏四月癸卯鎮海軍行軍司

馬兼侍中同平章事太尉鮑君福卒

君福字慶臣餘姚縣人也祖與

父臻俱不仕少羈貧性惇厚有膽氣餘姚有井面廣丈餘君福每恣臥其上而無畏色又能為馬上舞雙劍鄉黨異之及從軍以驍果稱初事婁漢宏及武肅王東討乃與其黨歸降號曰向盟都累從征伐有功能馬上輪雙劍入陣望之若飛電沉默少語軍中謂之鮑鬧尋為衢州應援指揮使屬刺史陳章叛淮人入其境乃以淮帥命辟為郡職君福不納武肅聞之患其被害乃密賜絹書使苟從之因與賊徒李元嗣飲伺其醉乃奔歸尋授衢州刺史淮將信州刺史周本屢侵其境君福每率數騎往逐之本遁去及將罷

郡武肅王勞曰比在任戰敵而已未足為副使優賀之道因復任之凡三考文穆王領清海軍節制辟為副使後遷湖州復二考累職鎮海軍節度副使浙西行軍司馬奏授登州刺史保大保順等軍節度使檢校太尉同平章事兼侍中卒年七十七歲敕諡曰忠壯是月甲子世子宏傳薨宏傳王第五子也母魯國夫人鄭氏時王年將四十九歲嗣未建及生特所鍾愛累奏授兩浙副大使果州團練使國建立為世子初王治世子府諸言曰何處有鹿脯將薨乃題所居屏障曰四月二十及期果薨年方十六歲追諡曰孝獻五月四星聚斗秋七月我師敗於建陽積雨乏糧故也八月王以世子府為瑤臺院冬十二月以忠獻王為衙內都軍都指揮使是歲姑蘇吳興嘉禾三郡大水

丑六年春三月丙寅敕遣太子賓客聶延祚吏部郎

中盧撰冊授王守尚書令亦作五年冊此吳書之文夏五月番禺

婁龔遣偽攝太尉工部侍郎盧膺尚儀謝宐清尚衣

高素清來逆我故王弟傳肅之室馬氏以為繼室不

克遣馬氏即潭帥楚王殷之女也先是番禺亦聘馬氏既卒遂求其弟是行也潭帥希範亦遣中軍

使歐陽練與廣使俱至馬氏誓不許故不克遣六月寧國軍節度使同參相

府事仰詮一作仰仁詮卒秋七月甲戌麗春院火延於內

城王遷居瑤臺院是月閩王曦稱大閩皇帝八月辛

亥王薨於瑤臺院之綵雲樓年五十五在位十年贈

諡曰文穆敕宰相和凝撰神道碑七年壬寅二月癸

卯葬於國城龍山之南原

王志量恢廓識度宏遠雖少嬰軍旅尤尚儒學事武肅孝敬小心未嘗有懈武肅性既嚴急每一召卽時須至或巾帶於步驟間乃致闊袴大襪以便之晚年政事一委參決簿書填委皆躬親批署手爲胼胝復置粉盤於臥榻之間夜有所記必書其上詰旦以備顧問時屬重盜賊及詐僞誹謗之法犯者輒死王皆力救之所獲宥者甚眾嘗北征師次平望蚊蚋尤甚左右請施帷帳王曰三軍皆在此我獨何避竟不許及纘嗣之後示以明恕人情翕然內衙指揮使陸仁章婁仁杞等早備武肅王

爪牙以性剛復爲眾所惡而亦嘗以事侵王一日同列者皆率諸軍於國門請王戮之王命姪仁俊諭之曰仁章等事先王有年矣今求舊念功方當旌賞汝等遂以私憾使我戮之我安爲爾報怨也苟不聽命我當歸臨安以避賢路眾皆退懼遂授仁章福州刺史仁杞湖州刺史中外有以封章相構者皆居中不下積而毀之王舅陳氏列職不過一戍邊每加厚賜而未嘗遷授恭穆夫人之弟馬充嘗以使役求免王庭責之遂下獄黜於剡溪其餘遵守治命保慎名器烈祖之風爲不泯矣一日

武肅王寢疾召將吏曰吾疾必不起諸兒皆愚劣誰可爲帥者諸將泣曰兩鎮令公仁孝有功孰不愛戴武肅乃出印鑰授王曰將吏推爾宜善守之又曰子孫善事中國毋以易姓廢事大之禮王與兄弟同幄行喪內衙指揮使陸仁章曰令公嗣先王霸業將吏旦暮趨謁當與諸公子異處乃命主者更設一幄挾王居之禁諸公子從者無得妄入武肅王未薨時仁章嘗以事犯王至是王勞之仁章曰先王在位仁章不知事令公今日盡節令公猶事先王也王嘉之王以遺命去建國儀用藩鎮

法除民田荒絕者租稅王於兄弟甚厚兄元璋自蘇州入見王以家人之禮事之奉觴爲壽曰此兄之位也而小弟居之是兄賜之也元璋曰先王擇賢而立之君臣位定當恭守霸業自爲珍重王因相與泣

論曰王以英毅之資兼仁厚之德入田頴豺狼之穴示亡身之慮破知誥蛇豕之羣對揚敵之威奮劔屢成其大勳壓紐遂當其慶嗣念功忘過崇德布政然後聿修先烈光紹世官天子賴於元勳諸侯奉爲盟主以稱克家之令嗣以號列國之賢君

則形弓緇衣不足侔其美也

吳越備史卷之二 終

吳越備史卷之三

宋 錢 儼 撰

清 席世臣 訂

忠獻王 附 忠讓王

忠獻王諱宏佐字元祐文穆王第六子也母吳越國  
仁惠夫人許氏王以天成三年七月二十六日己巳  
生於功臣堂初奉獻世子之居監撫也文穆王治其  
府於城北將俾居之一日奉獻會王以采戲於青史  
樓遽謂王曰君王方為我營府署今與爾賭之比及  
四擲而王遂得六赤奉獻失色王從容曰五哥入府



諱當將符印之命因再拜奉獻竟怒擲骰盆於樓下

俄而奉獻薨王授兩軍節度副使檢校太傅天福六

年秋八月諸將請誅內衙指揮使戴惲惲乃王庶兄

謀立宏侑故請誅之免宏侑是月王以遺命承制授

兩軍節度使九月庚申王即位於仙居堂赦境內外

班賚有差及租稅等丞相曹仲達攝政事是月辛未

王遷於思政堂命境內給復一年諸關梁禁制悉從

除減又命田園有隸道宮佛寺比入賦稅者悉免冬

十月長星見十一月金陵來祭我先王是月敕授王

起復鎮國大將軍右金吾衛上將軍員外置同正員

領鎮海鎮東等軍節度檢校太師兼中書令吳越國

王食邑一萬戶實封一千戶仍賜保邦宣化忠正功

臣是月番禺劉龔殂子洪晟嗣

寅七年春正月閩人來祭我先王二月癸卯敕葬先

王於龍山之南原三月敕遣使太中大夫李鸚來歸

文穆王明乙丑中吳建武等軍節度使廣陵王世父

元瑋殂子文奉嗣元瑋字德輝武肅王第四子也起

度判官累遷散騎常侍賜金紫尋屬軍旅事乃改授

馬軍廳事指揮使天復二年徐綰叛顧全武請奉王

子之邗溝武肅以淮帥嘗請結媼好乃遣元瑋微服

為全武僕而去比及望亭有逆旅媼識之至潤州

安仁義亦知其非常將其下十人易之全武懼因賂

閹吏中宵而去及抵邗溝指陳逆順之理淮帥為之

勤容嘆曰生子當如錢郎吾之子狍犬耳即日遣使  
 命額還軍廣陵尋迎婦而歸後累征縉雲新定皆有  
 功授邵州刺史尋征吳興高豐及攻東州復授睦州  
 刺史尋遷蘇州累教授中吳建武等軍節度使蘇常  
 潤等州團練使太傅同中書門下平章事待中中書  
 令在郡三十年性儉約而恭靖便弓馬文穆王即位  
 以王兄尤加禮遇因元璩來觀為酒壽璩曰今日之  
 事宜兄當之俾予小子至是實兄推戴之力璩俯伏  
 曰大王功德高茂先王擇賢立能君臣之分敢忘忠  
 順因相顧感泣久而益歡尋奏敕封廣陵郡王封不  
 及授宣命於柩前終年諡曰宣義壬申制加王食邑  
 五十六歲葬之以王禮  
 七千戶仍改賜保邦宣化忠正翊戴功臣夏四月漢  
 主龔殂子玠立六月晉高祖崩少主重貴即位秋七  
 月王以內衙指揮使章德安李文慶為內衙左右都  
 監使冬十月以都指揮闕燔胡進思為內衙左右統

軍使十二月己巳以龍山武功堂為文穆王廟

癸卯八年春正月癸未重建功臣堂二月晉主還京是

月丙辰吳越丞相皮光業卒光業字文通世為襄陽人父日休有盛名為蘇州軍事判官太常博士光業生於姑蘇十歲能屬文

及長以所業謁武肅累署浙西節度推官賜緋武肅命入貢京師梁後主特賜進士仍賜祕書郎授右補闕內供奉賜金紫貞明中淮人來求好命光業聘之及還贈錢三百萬復禁其出且曰可以市易光業曰我使介也豈賈豎也乃委置而去淮人亟載隨之梁主選武肅子傳珍為駙馬都尉命光業如京師及回至靖海光業舅氏滕文規為山陰令日暝遽見黃衣吏報曰皮補闕今日已及靖海文規詰之遂失所在尋兼兩浙觀察度支使文穆即位命知東府事初光業遊會稽有神降於里巷光業往視之神遂不語及去眾詰之曰皮秀才來神何不語荅曰皮秀才此土地主我小神不當見之至是果驗國建拜丞相凡教令儀注多其所定光業美容儀善談論人或以為神

仙中人終年六十七歲贈諡曰貞敬三月唐主昇殂子璟嗣年

號保大閩富沙王王延政稱帝國號殷是月漢彭洪

熙弒主玠而自立夏四月朔日有蝕之秋七月王貶

內衙都監使章德安於處州李文慶於睦州冬十月

敕遣使授王吳越國王玉冊

冊曰維天福八年歲次癸卯十月丙午朔六日辛

亥皇帝若曰在天成象拱辰分將相之星惟帝念

功啓土列侯王之國朕所以法吳穹而光宅稽典

禮以疏封而況世著大勳時推令器探寶符而嗣

位杖金鉞以宣威羽翼大朝藩籬東夏宐列諸侯

之上特隆一字之封簡自朕心協於輿論咨爾保

邦宣化忠正翊戴功臣起復鎮國大將軍右金吾

衛上將軍員外置同正員檢校太師兼中書令杭

州越州大都督充鎮海鎮東等軍節度浙江東西

等道管內觀察處置兼兩浙鹽鐵制置發運營田

等使上柱國吳越國王食邑一萬七千戶實封四

千戶錢諱為時之瑞命世而生負經文緯武之

才蘊開物成務之志英華發外精義入神亞夫繼

社稷之勳顧榮擅東南之美眷言祖考志奉國朝

清吳越之士疆執桓文之弓矢天資厥德代有其

人荷基構以克家事梯航而述職殊庸斯在信史  
有光是舉彝章爰行盛典土茅符節方推翼世之  
賢黻冕輅車更重策勳之禮斯為異數允屬真王  
今遣光祿大夫檢校司徒行太子賓客上柱國太  
原縣開國男食邑三百戶王玫使副正議大夫行  
尙書吏部郎中柱國賜紫金魚袋趙熙等持節備  
禮冊爾為吳越國王於戲周寵元臣四履錫命漢  
封異姓八國始王指河嶽以誓功俾子孫而襲爵  
爾纘舊服朕考前文勿忘必復之言更廣無窮之  
祚懋昭前烈爾惟欽哉

十一月辛巳王遷於功臣堂是月癸未吳越丞相曹

仲達卒仲達臨平人也本名宏達避王名更之祖信

為臨平鎮將八都建時信因保嘉興東界遂家臨平

焉父圭浙江西道營田副使檢校太尉圭將生時信

夢人曰我當為爾子有二千石信語夢於鄉黨鄉黨

不能論皆賀曰生此子必致豐稔圭有膽氣乾寧中

淮人圍嘉禾圭與其族人師魯守之賊中望氣者曰

此孤城中有異人不可圖也圭每與師魯登樓張樂

縱飲矢石交至視之宴如也嘉禾平圭以功授蘇州

刺史開平間淮人復圍蘇州屬正月望夜師魯第盛

陳燒燈之宴賊之俘執者咸縱之觀圭終蘇州師魯

形短而足跛武肅嘗稱之曰今之晏平仲也人遂號

為曹晏嬰竟卒於鎮東軍都押衙仲達初生室有紫

光少學圭常節其衣食雖嚴冬尚未挾纈品膳悉與

僕吏等同日令運糴圭在姑蘇時與仲達求婚睦

州陳詢及將送卜之曰陳氏親必不就當聘他門由

是榮貴既而途由國城武肅王見而奇之乃以王妹

儷焉累授台處二州刺史文穆卽位居諒闇命仲達

權知政事國建拜丞相今王即位復攝政事時大賚中外諸軍軍中有言不均者輒舉仗受賜諸將不能制仲達諭之因皆釋仗而致謝仲達性仁厚好施與文穆九重之常止呼丞相而不呼其名終年六十二贈諡曰安成是月納元妃仰氏乃寧國軍節度使同參相府事仁諡之女

甲辰開運元年春正月壬寅丞相林鼎卒

鼎字渙文閩人也父無隱

鼎生於明州大隱村初刺史黃晟頗好禮士無隱依之有詩名嘗爲詩云雪消二月江湖闊花發千山道路香知言者以無隱必有貴子鼎初謁武肅以爲觀察押衙推官尋爲文穆幕府文穆怪其才行累薦不見用一日復密薦之武肅王曰我觀林鼎骨法真輔相器然我不貴者欲汝貴之庶其盡心於汝也文穆襲國署鎮海軍掌書記節度判官鼎性謙正而強記能書歐虞法比及中年夜讀書必達曙所聚圖書悉由手抄其殘編蠹簡亦手綴之無所厭倦國建乃掌教令尋拜丞相每正事卽不逮者鼎必極言之天福

中建州之役鼎指陳天文人事累疏切諫及師行果不利有著文集行於世終年五十四歲諡曰

貞獻三月僞閩王延曦爲其下指揮使朱文進所弑而文進自立復修於京師是月敕授王落起復增食邑三千戶實封一千戶夏四月丙午王親祀五廟秋七月辛未朔晉少主改元開運大赦以彭城知遠爲行營都統九月朔日有食之南船務石井有物形如守宮尾長七尺許鬣且角獲之置於安溪潭冬十一月王命從兄東府安撫使仁俊爲內外馬步都統軍使弟宏保爲東府安撫使閏十二月閩人殺朱文進尋以僧儼明爲主儼明姓卓氏乃雪峯寺僧平素爲眾所重相與迎之遂立爲帝未幾

為其下李仁達所殺而自立歸款金陵

乙開運二年春三月丙午王從祖順化軍節度使鐸

卒鐸字輔軒太師英顯王之第五子武肅王之少弟也生而有文狂其足曰正及長而滅既生而太師

薨武肅育之武肅薨鐸請服通喪性多藝尤精音律承制累授溫明二州刺史檢校太尉奏授思州防禦

使文穆時授兩浙行軍司馬拜命之日儀注特盛尋奏改本州團練使順化軍節度使終年五十五歲

敕諡曰忠簡夏四月晉主還大梁秋七月修武肅王

廟於城西奉旃檀神像而致焉八月朔日有蝕之是

月金陵遣將王建封克建州虜王延政而歸冬十月

敕遣太子賓客羅周岳右庶子王延濟冊王守太尉

十一月朔王大閱於北郊是月誅內牙都監使杜昭

達內衙都指揮使闕燔庶人孫本賜死貶都統使王

兄仁俊本府安置杜昭達闕燔皆好貨程昭悅以金寶交結二人薦於王昭悅得侍左

右愛待踰於舊將燔不能平昭悅懼謀去燔燔專而復國人皆惡之王亦惡之於是昭悅出燔為明州刺

史右統軍使胡進思為湖州刺史燔謂進思曰出我

是棄我也進思曰老兵得大州幸矣何為不行乃各

受命既而復畱進思而統軍使王子仁俊母乃杜昭

達之始也昭悅因譖昭達燔謀奉仁俊作亂下獄鍛

鍊成之誅昭達與燔幽仁俊於東府昭悅收仁俊故

吏慎溫使其證仁俊之罪拷掠備至溫終堅守不屈

王甚嘉之擢為國官丙三年春二月朔日有食之三月敕授王東南面兵

馬都元帥增食邑二千戶實封五百戶仍改賜推誠

匡運忠亮威德功臣秋七月庚寅吳越國夫人許氏

薨夫人丹邱人也諱新月善音律文穆王後庭樂部皆命掌之初鄭氏生孝獻世子立於後庭咸尊敬

之有尼契雲掌香火於麗春院之佛堂頗有知人之鑒視夫人曰彼鄭氏者遠不能及至是果如其言至

王龔位遂敕封吳越國夫人薨年四十四歲 敕諡曰仁慧八月重建天寵

堂是月壬申葬仁慧夫人於國城西山之原冬十月

金陵攻福州節度使李宏義遣客將徐仁宴李廷諤

等求救於王李宏義本名達殺卓儼明而歸款金陵因授之節鉞仍編入屬籍更名宏義既

而遣僞兵部侍郎陳覺使於宏義覺還及建州又遣侍衛官顧忠以金陵僞救使之入觀宏義以其初不

宣命至是方以書至不從覺乃與監軍使馮延魯自建州興師皆金陵之志也 是月王命統

軍使張筠趙承泰等率水陸兵三萬人以救蕪諸時

福州乞師於王王召諸將議行諸將吏將曰道路險

遠難於師救內衙都監使水邱昭券以為當救王曰

唇亡齒寒吾為天下元帥曾不能救鄰道將安用之

諸軍直樂飽食安坐耶王乃命募兵無有應者王命

糾之曰糾而為兵者糧賜減半於是應募者雲集王

命昭券專掌用兵程昭悅掌應援饋運事而以軍謀

委元德昭乃遣筠等帥師救之時王召左右議鑄鐵

錢以益將士祿賜王弟宏億諫曰鑄鐵錢有八害新

錢既行舊錢皆流入鄰國一也可用於我國不可用

於他國則商賈不行百貨不通二也銅禁至嚴民猶

盜鑄况家有鐳釜野有鐔犁犯法必多三也閩人鑄

鐵錢而亂亡不足為法四也國用幸豐而自示空乏  
五也祿賜有常而無故益之以啓無厭之心六也法  
變而弊不可遽復七也錢者國姓易之不祥八也王  
深嘉之乃止是行也宿衛衣錦軍武肅王廟廷者聞  
甲馬號令之聲凡數夕而止及接戰於閩淮人視王  
師周徧郊野人皆丈餘蓋乃陰兵之助也十二月王  
命弟宏偁為湖州刺史

丁未四年春正月天皇王入東京稱會同十年封晉少  
主為負義侯遷於契丹黃龍府二月有雉巢於玉華  
樓是月晉彭城知遠稱帝於河東國號大漢是為高祖

復稱晉天福十二年是月王誅內都監使程昭悅釋  
東府仁俊罪也三月庚寅今大元帥吳越國王諱

出鎮丹邱是月王遣將余安率水軍救福州大敗  
淮師獲其將都指揮使楊匡業蔡遇等偽東南面行  
營都統王建封等走之擒戮裨將孟堅等并餘黨二

萬餘眾器械數十萬李宏義歸附於王更名孺贇初李

宏義之治閩城壘壁皆有錢文曰此城終歸錢氏宏  
義頗惡之因命剗去而錢文愈明又謠曰風吹楊葉  
鼓山下不得錢來戈不罷至是皆驗是行金陵歸罪  
於陳覺馮延魯謂其專命而行也金陵始以覺為東  
南面招討使延魯為監軍及其敗績反以專命為罪  
以贖其所恥一何偷哉為君而偷復歸罪於下其喪  
師也不亦宜乎夏四月李孺贇遣弟孺賓來請入覲從之五



月我師凱旋王饗將帥於光冊堂賞賚有嘉是月敕授王諸道兵馬都元帥增食邑五千戶實封五百戶仍改賜資忠緯武恭懿翊戴功臣是月楚王希範殂弟希廣嗣六月乙卯王薨於咸寧院之西堂年二十在位七年敕諡曰忠獻八月敕葬龍山之西原

王英明果斷權變不測初嗣位尙少溫柔好禮恭勤政務發摘姦伏人不敢欺諸校驕恣者多優容之及被譴皆不知覺義兵籍使錢承德家火俯通內城命親軍援之王登樓而望有伺便攘竊者亟命斬之眾因悉力火遂滅淮人之攻閩也李孺贊

來求援諸將議將不從王因集而詢之某同其說王變色曰唇亡齒寒春秋明義吾爲天下元帥執大兵柄豈不能恤鄰難乎乃命水邱昭券專掌用兵程昭悅專掌應援饋運而諸將躍馬肉食不能爲我身先卽有異議者斬及大舉遣將誓師辭命明肅眾皆踊躍承命旣而果成大功開運中將益車徒乃下令募軍中及民間子弟而踰時無應者乃命大糾之令曰糾而得之者糧賜皆蠲半翊日投書者兩集遂加精練南方之捷多其力也民有獻嘉禾者王問倉吏蓄積幾何對曰十年王曰然

則軍食足矣可以寬我民乃命有司復其境內租  
稅三年

論曰王岐嶷之姿雖由天縱纘嗣之日方屬眇年  
帑藏因回祿之初將校競陸梁之志故能恭勤庶  
務紹開霸圖有果斷之名無酣嗜之累以至興  
公室開拓土疆光有大功聿修厥德而享祚非永  
孰不哀哉

忠遜王諱宏侖文穆王第七子季獻世子同母弟也  
起家內衙指揮使檢校司空開運元年冬十一月出  
爲東府安撫使累授檢校太尉尋拜丞相開運四年

六月丙寅卽位於天冊堂是月晉主八大梁號曰漢  
秋七月閩帥李孺贊來覲是月庚子有雉升於天冊  
堂之戟門旋歷廊廡久而獲之閏七月王命李孺贊  
復任於蕪諸王親餞於碧波亭八月葬忠獻王於國  
城之西原冬十月今大元帥吳越國王至自丹邱十  
二月李孺贊復貳於我王命東南面安撫使鮑修讓  
攻討擒而戮之己酉傳首國城是月命丞相吳程知  
福州威武軍事庚戌內衙統軍使胡進思指揮使諸  
溫斜滔等以內衙兵遷王於義和後院諸將校率眾  
迎今大元帥卽位焉

自忠獻王時諸校驕慢雖屢加誅殛而在位者皆  
優禮遇之及王纘嗣性既嚴急誅杭越侮法吏三  
人而統軍使胡進思恃迎立功干預政事王惡之  
每有僭越必顯責讓進思頗憂懼不自安屬內衙  
指揮使何承訓希旨請誅之又謀於都監使水邱  
昭券昭券以進思黨盛難制請於王且容之王猶  
豫未決承訓亦懼反以謀告進思進思遂亂率親  
兵戎服入見王叱之不退猝愕入義和院進思鎖  
其門矯稱王命告中外曰王猝得風疾傳位於宏  
俶因率諸將迎今大元帥於私第且言於丞相元

德昭德昭至立於簾下不拜曰俟見新君進思等  
亟出褰簾德昭乃拜進思稱王命承制授元帥元  
帥曰若全吾兄乃敢承命不然當避賢路進思承  
之元帥始視事於是進思殺水邱昭券進思妻曰  
他人可殺昭券正人君子也柰何殺之乎初遜王  
將卽位近侍陳禹嘗夢以金鈔鑼承日輪加遜王  
之頂而手持二環未幾墜地既而以夢語人人曰  
汝主將有非常之事然其二環不過二十旬耳及  
卽位又以黃金一鎰命近侍袁文昌鑄巨錢文昌  
意其有所求識且懼不就乃宿謀於匠者別鑄一

以爲備翊日以所授金鑄之遜王臨視果不就因  
潛以宿鑄者獻至是皆驗其兆後廢王薨請諡曰  
忠遜以王禮葬會稽秦望山之原  
論曰王以英敏之才惡強梁之黨納承訓阿順之  
說中進思廢立之機輕發寡謀至於失位故知君  
不密則失臣臣不密則失身誠哉斯言也猶賴鴿  
原之至愛致稽嶺之安居養玉體以終天年掩泉  
扃而備王禮古之廢君失國未有若斯之安全者  
其實忠懿王之仁與季爲足多哉

吳越備史卷之三

終

吳越備史卷之四

宋 錢 儼 撰

清 席世臣 訂

今大元帥吳越國王

王諱俶字文德文穆王第九子也母吳越國恭懿太  
夫人吳氏王以天成四年歲己丑八月二十五日生  
於功臣堂天福四年十二月承制授內衙諸軍指揮  
使檢校司空忠獻王時累授王特進檢校太尉開運  
四年春三月庚寅出鎮丹邱卽台州也下車數月有僧德  
韶語王曰此地非君爲治之所當歸國城不然將不

利矣王從其言即求歸秋九月甲戌發自丹邱歸觀  
也是日大風東面有雲若樓閣之狀識者異之冬十  
二月內衙統軍使胡進思指揮使諸溫斜滔等幽廢  
王於義和後院乃召諸大校及諸率中外軍庶奉迎  
王於南邸晡時王見府僚將校於帥府之外簾謙讓  
者三諸將校以王素有德望俯伏稱賀即日王以鎮  
海鎮東等軍節度檢校太尉兼侍中蒞事於帥府之  
南序也

戊申乾祐元年春正月辛亥朔漢帝南郊大赦改元是  
月乙卯王即位於天寵堂赦境內租稅班賚有差

天寵

堂即忠獻王重建逮於廢上不克遷徙至是而王臨位焉

自前年季冬浹於正口

陰晦彌月是日雲物澄霽中外人情胥悅壬戌遣將  
兵奉廢王於衣錦軍丙子漢主崩少主承祐即位二

月辛卯王親祀五廟乙未誅內衙指揮使何承訓懲

其反覆中外大悅

初廢王將黜胡進思而承訓預其事議未決承訓反告於進思及王

即位復請誅進思王惡其反覆立命斬之三月敕遣中書舍人張誼來歸

忠獻王聞未幾內衙統軍使胡進思請誅廢王王不

許於是進思憂懼而卒

先是王遣都頭薛溫領親兵保衛廢王且戒之曰爾等小

心衛護吾兄若有異事當死拒之至是進思請誅不遂乃詐以王命令薛溫害之溫曰僕受命之日不聞此言決不敢妄發也進思仍乃夜遣二賊踰垣而入欲刺廢王廢王闔戶大呼薛溫聞之率眾而入夜二

鼓篋二賊於中庭至是進思聞  
二賊死憂懼不二日發疽而死夏四月大閱馬步六  
月朔日有蝕之冬十一月下令以每歲租賦逋滯者  
悉蠲之仍歲爲著令百姓歌舞焉

乙酉二年春二月匡武都連名輒舉求職王命斬狀首  
二人坐黜者二十餘人餘宥之三月敕授王東南面  
兵馬都元帥鎮海鎮東等軍節度使浙江東西等道  
管內觀察處置兼兩浙鹽鐵制置發運等使開府儀  
同三司檢校太師兼中書令杭州越州大都督上柱  
國吳越國王食邑一萬戶實封一千戶仍賜匡聖廣  
運同德保定功臣夏四月太白晝見是月乙亥城西

上清宮災五月內衙指揮使斜滔以罪黜於處州六  
月甲申日有蝕之秋七月朝廷命擒河中府李守貞

初守貞之叛求援金陵僞齊王景達舉兵應之未幾守貞就擒淮人壓境而退是月王命弟

宏億爲明州刺史冬十月敕遣散騎常侍張煦等持  
節備禮冊王爲吳越國王仍賜玉冊金印法物等

冊文曰維乾祐二年歲次己酉十月庚午朔十九  
日戊子皇帝若曰我先帝承有晉崩離之後醜鹵  
充斥毒螫中夏用順天致罰大拯黎元太阿一揮  
胡馬宵遁享萬靈於無主解兆庶之倒懸較定世  
勳以吳越居右伊朕眇末虔奉先訓嗣位之始卽

吳越傳  
三  
酬懋功前命爲元帥授地圖授武節東南之境得  
行征伐命冊爲眞王駕大輅執桓圭牛斗之鄉盡  
荒土字詢於有位僉曰克諧咨爾匡聖廣運同德  
保定功臣東南面兵馬都元帥鎮海鎮東等軍節  
度使浙江東西等道管內觀察處置兼兩浙鹽鐵  
制置發運營田等使開府儀同三司檢校太師兼  
中書令杭州越州大都督上柱國吳越國王食邑  
一萬戶實封一千戶錢諱象緯炳靈公王襲慶橫  
江負海者三千里開國承家者六十年而能望辰  
極以駿奔奉天朝之師律克庭納貢則外府告盈

下瀨宣威則前茆獻捷忠信著於羣后禮讓行於  
一方故元冕九章爲王之服昭其名也朱輪駟馬  
爲王之馭昭其器也而又三吳百越列土分疆有  
民人焉有社稷焉恢祖禰之令圖實典禮之鉅著  
勸夫忠孝以御邦家今遣正議大夫守右散騎常  
侍上柱國賜紫金魚袋張煦右補闕崔頌持節備  
禮冊爾爲吳越國王於戲品秩甚尊名數九重肅  
廣庭而備物揀吉日以覃恩爾其正厥位事大以  
敬教民以順馭眾以恩神其福之禮曰惟王建國  
諸侯所以守舊邦書曰惟帝念功王者於是出好

爵匡我堯緒永為漢藩浙江如帶稽山如礪福祿無窮貽厥百世汝往欽哉對揚我休命

是月內衙指揮使諸溫以罪黜於溫州是歲下令以

境內田畝荒廢者縱民耕之公不加賦時王募民墾荒田勿取其

租稅由是境內并無棄田或有請糾遺丁以增賦者王命杖之國門民皆大悅

戊辰三年春二月金陵以偽永安軍節度使查文徽取

福州遣劔州刺史陳誨泉州刺史畱從效率率兵犯我

蕪諸王命指揮使潘審燔率師禦之遂生擒查文徽

及行軍判官楊文憲等三十餘人斬馘萬計陳誨畱

從効等走之

初福人告查文徽曰吳越兵已棄城去請公為帥文徽信之乃遣陳誨率水軍

下閩江文徽自以步騎繼至城下閩州刺史吳程詐

遣兵數百出迎文徽而誨諫曰閩人多詐未可圖也

宜立寨徐徐圖之文徽曰疑則生變不若乘機據其

城乃引兵徑進誨整眾鳴鼓還於江湄吳城與潘審

燔等勒兵大擊賊大敗之遂執文徽等士卒是月甲

戰溺死者一萬餘人陳誨等率親部而遁

午吳越國丞相中書令鄖國公杜建徽卒諡曰威烈

建徽字延光新城縣人也祖仲明不仕累贈水部員

外郎父稜贊忠去偽功臣兩浙行軍司馬鎮海軍節

度副使常潤二州刺史初八都建稜率鄉黨以武安

為號時武肅王輔董庶人起石鏡鎮旋平婁漢宏功

業寢盛稜謂諸子曰吾每責人不過十罰則為之傷

心而觀錢公每有斬決皆談笑自若成大事者是人

也汝當事之必貴吾族稜遂歸於我光啓三年命征

薛朗平之遂為常州尋遷潤州乾寧中安仁義適東

陽命稜率師討平之及武肅王以宣州降卒隸中軍

號武勇都前後左右皆無賴稜常患之乃密疏曰狼

子野心觀武勇將士終非大王所蓄願以士人代之

武肅王不聽及徐綰叛命使祭之旌其先建徽即稜

吳越傳

卷四

五

掃葉山房



子也少強勇不與諸第類嘗於山莊構小茆齋輒私  
 署軍州押衙紀於棟鄉里見焉驚因聞於稜稜亦加  
 責徽對曰大丈夫何止一軍事押衙耶始從軍無事  
 人之志及稜歸武肅王乃從父命而盡心於我稜在  
 常州為淮人所逼徽馳赴南歸軍中嚴整無改稜尤  
 率所部還新登及稜自淮南歸軍中嚴整無改稜尤  
 稱之徽累征伐皆單騎入陣賊眾無不披靡所至輒  
 立大功軍中謂之虎子乾寧初從征董庶人被射中  
 肩徽亦能戰開平中與武肅王弟鐸率師救姑蘇與  
 敵遇因逼河梁上斷乃鞭馬徑渡及岸馬斃遂瘞  
 之號曰馬塚至今存焉徐縮之叛徽馳自新登以本  
 部赴難因命守禦時賊將聚木焚北門徽使持火鉤  
 取其木先焚之遂不得聚賊計遂罷時有勸王東保  
 命與賊耳武肅王納之睦州陳詢之貳我東渡亦保  
 為詢媼姪頗疑之乃使馬綽伺其意徽曰陳氏負恩  
 背義自貽覆族之禍或見照則拔城獲書方明徽心  
 諭之皇天后土苟或見照則拔城獲書方明徽心  
 俄有睦州聽吏來降持徽兄建思嘗譖徽於武肅王嘉嘆  
 久之賜徽錢一百萬徽兄建思嘗譖徽於武肅王嘉嘆

第中蓄兵仗將為異圖王使人閱之徽方食使者強  
 抵徽臥內徽但食不顧使者還言於武肅王王感悟  
 益加殊待及構第於城內王親與規畫徽性儉樸出  
 入導從不過數人凡財物多散鄉里親屬武肅王每  
 會人必指之曰此杜丞相今日塵黍多其力也忠獻  
 王時其孫昭達為內衙都監使盛治第宅強徽觀之  
 曰乳臭兒不諳事乃爾後昭達果以罪誅徽及春秋  
 高尚能騎射嘗從擊毬於廣場與酣有宿中箭鏃被  
 臂中飛出人皆壯之徽為詩自敘曰中劍斫耳缺被  
 箭射脾過為將須有膽有膽即無價初稜將亡散家  
 財與諸子惟徽但授一笏有膽即無價初稜將亡散家  
 汝能傳之徽歷官自武安都將國子祭酒至涇原昭  
 化等軍節度使累官吳越國丞相兼中書令封郎國  
 公皆自國初至忠獻王以來奏授也凡子弟孫姪多  
 連姻公室朱紫車馬充溢門庭有三月敕授王守尚  
 國以來莫比其盛卒年八十八歲三月敕授王守尚  
 書令增食邑二千戶實封五百戶夏四月王以查文  
 徽等獻於五廟國人為之聳觀

先是征伐以來擒獲  
 雖眾而獻俘之禮至

是始是月丙午王親享五廟六月敕授王兄東府安撫使宏儼知福州威勝軍事秋七月命弟宏億爲東府安撫使冬十月王歸查文徽於金陵十一月朔日有蝕之是月漢少主遇弑是歲潭帥馬希廣爲兄朗帥希萼導金陵遣將邊鎬守之當日悉遷馬氏之族於金陵殺楚王而自立是月漢太后臨朝

辛亥廣順元年春正月周太祖卽位大赦改元廣順漢太后遷居西宮三月制授王諸道兵馬都元帥加食

邑一千戶實封三百戶仍降尙書令冊禮夏四月王

奉廢王居東府卽越地王築宮室治園圃花卉山石池塘亭苑奉廢王日悞悅之歲時供

饋甚加厚焉夏六月丙午武勝清海等軍節度使王世父

元懿薨追諡曰宣惠以其子仁倣嗣元懿字秉徽武肅王第五子母

李氏懿有燕領之相起家鎮海軍右直都知兵馬使尋授安國衣錦軍防遏指揮使累授檢校兵部尙書懿性至孝而純直其母嘗侍武肅王指令不稱旨被捶自是成疾每疾發侍婢多厭倦惟懿不離左右雖糞溷亦親侍之常在衣錦城出遊諸野遇菖蒲花尋收之新定一日閭里間輒數處火起民頗憂恐有巫楊韞因之遂與妖言曰某日某處復當火災皆如其言民由是競禱之懿謂左右曰火如巫言巫爲火也宜殺之以息其奸於是命斬韞於市火遂絕貞明中自新定判東陽東陽之南有白砂郡人畏而奉之每歲三月有大風雨自白砂起過郡城或言神本海龍每歲一復東海爲怪壞民廬舍及懿臨郡夢朱衣言曰白砂王奉啓相國今以他適將由郡城且慮驚駭已由南山而去翊日風雨果如之入皆異之頗喜遊宴彫飾之事文穆王襲國禮敬尤篤懿每飲酒及其半而傾於地文穆王因宴乃致鈔鑼於懿前意成

其事懿自是遂改累奏授賓睦二州刺史清海武勝等軍節度使太傅同中書門下平章事金華郡王終年六十六在郡三十年初懿為新定有卜士方氏時人號龜精常卜數以遺懿曰太乙接天河金華寶貝多郡侯六十六別處不經過至是果如其言是月命復王兄仁俊官爵

壬子二年春二月制授王天下兵馬元帥增食邑二千

戶實封五百戶改賜推誠保德安邦致理忠正功臣

夏四月朔日有蝕之敕衢州刺史王叔元瓊知福州

威勝軍王弟宏偓為衢州刺史六月乙未王妣吳越

國順德太夫人吳氏薨追諡曰恭懿夫人錢塘人諱漢月中直指揮

使吳珂女也幼而婉淑奉文穆王時恭穆夫人尤寵愛之夫人善鼓琴性慈慧而節儉頗尚黃老學居常被道士服餘皆布絹而已每聞王決斷政事有及重刑者夫人常輦蹙以仁恕為言諸吳將有遷授皆峻

阻之及其入對多加訓勵有過失者必面責之故諸吳終夫人之世不甚驕恣敕封吳越國順德夫人薨

十九年秋八月敕葬恭懿夫人於錢塘慈雲嶺之西原

九月甲寅朔丞相裴堅卒諡曰文憲堅字廷實吳興人父光庭累官

至中書令有術士張景藏能言休咎以紙大書台字以遺光庭不旬日果貶台州刺史大有政聲堅幼明敏善屬文及長有知人之鑒事吳越國有善政條教有方累官禮部尚書中書令拜吳越國丞相卒年五

十六冬十月朗州指揮使彭言姓犯武肅王舉兵逐邊

鎬克復湖南獻捷於朝廷以為武平節度制置武安

等軍事因遷湖南節制府於朗州

癸丑三年春二月湖州所隸建州降卒鄭懷嵩等十一

人以刺史散香於資福寺遂率其黨二百餘人作亂

即日盡誅之三月敕授王起復鎮東大將軍左金吾衛上將軍員外置同正員王以兄宏儼爲溫州刺史夏四月建報恩元教寺於城北薦王妣也王親閱內外諸軍非驍勇者皆停放之冬十月大閱馬步軍艘艫於碧波亭十一月命弟宏仰爲台州刺史十二月湖南王逵舉兵執朗州彭城言囚之朝廷尋授王逵湖南節制是歲東陽有大象自南方來陷陂湖而獲之境內大旱民有鬻男女者命出粟帛贖之歸其父母仍命所在開倉賑卹

甲寅顯德元年春正月丙子朔周主祀園邱改元是月

周太祖崩晉王卽位是爲世宗夏五月王命鑄王妣恭懿太夫人銅容二致於奉國金地二尼寺秋七月敕遣使加授王天下兵馬都元帥仍賜金印冬十一月敕遣進奏使章思忠歸諭機事航艦不利思忠溺焉是月漢主旻殂子鈞立

乙卯二年春二月朔日有蝕之三月制加王食邑一千

戶實封四百戶夏四月庚子王親祀五廟秋七月庚

午有虹入天長樓樓在內城之東王避寢於思忠堂九月王

復於天寵堂閏月世子惟濬生冬十月敕遣司空李

穀率師伐金陵十二月王遣使入貢敕王出兵會擊

金陵是月王師渡淮

丙辰三年春正月車駕東征詔王以國兵分路進討是

月南擊場門樓火金陵李璟僭稱唐皇帝致書於京

師仍令偽皇太弟璲致書於統帥李穀又遣偽宰相

孫晟等入貢二月王師入淮南靜海軍制置使姚彥

洪率家屬軍士戶口等一萬餘人奔於王是月王命

丞相吳程前衢州刺史鮑修讓等攻毘陵命都指揮

使路彥銖等伐宣城命都指揮使羅晟等督水師次

江陰以應王師也既而敕遣殿直薛有光來宣諭仍

賜沿身衣冠法物三月我師克常州生擒刺史趙澤

偏將諸承向重霸等一百餘人遂班師

時營田副使陳滿言於丞

相吳程曰周師南征舉國驚擾常州無備易取也吳程如其言請於王從之丞相元德昭上曰唐大國未可輕舉也若我師入唐而周師不至能無虞乎吳程固爭王遂遣程取常州也是月金陵遣

偽燕王宏冀服據淮南王命從弟蘇州刺史文奉為

應援都統使屯於本州備徵發夏五月建州刺史陳

誨以小船沿溪而下福州指揮使馬進姚章等執於

賊未幾陳誨亦宵遁是月車駕還京六月王命兄仁

俊復知福州威武軍事秋九月癸卯王親閱於龍山

教場冬十月駕親征壽春是歲始括境內民丁益師

旅也

丁巳四年春正月始議鑄錢三月我師大敗淮人於壽  
春夏四月宣諭使薛有光從航海歸於京師是月周  
主還大梁秋七月王命弟宏信爲衢州刺史八月敕  
遣諫議大夫尹日就至賜王生辰御服紅袍二副冬  
十一月駕復東征是月泉州刺史畱從効請修貢於  
京師附我以聞詔從之

戊午五年春正月丁未前衢州刺史王弟宏偃卒

偃字贊堯

文穆王第十二子也母陳氏偃性仁慈事母以恭勤  
聞及爲信郡時屬歲旱部民將逐食於他郡民不忍  
別偃俱詣郡廳告白而去偃爲之流涕其爲政寬恕  
厚重王加友愛尤篤及卒中外無不嘆惜終年二十  
五歲二月王師復維揚敕遣殿直趙誨來宣諭仍出艘

艦於瓜步迎鑾長風涉等處王師欲濟江乃命上直  
都指揮使邵可遷路彥銖等率艦四百艘水師二萬  
以會之江北諸郡悉平三月王不康是月敕命翰林  
學士都承旨陶穀司天監趙修已賜王羊馬橐駝每  
歲班賜自此始也是月金陵李景復稱江南國主遣  
僞臨汝郡公徐遼宰相馮延巳奉表稱臣於行在初  
金陵之將內附也王亦飛書以諭之既而景等亦附我也王亦以誠款聞詔從之  
王師乃罷夏四月辛酉城南火延於內城王出居都  
城驛詰旦煙焰未息將焚鎮國倉王親率左右至瑞  
石山命酒以祝之曰不穀不德天降之災宮室已矣

而倉廩儲積蓋師旅之備實所痛惜若盡焚之民命  
安仰天其鑒之乃命從官伐林木以絕其勢火遂滅  
卽日王見丞相以下罪已之不暇且曰吾旬月所苦  
尤至而災釁之餘遂覺康裕中外聞之頓安是月王  
命弟宏儀復爲東府安撫使是月敕遣天下都軍頭  
周廣來宣諭仍賜邵可遷等及將士衣服有差五月  
朔日有蝕之唐主去帝號奉周正朔六月戊寅前  
台州刺史王弟宏仰卒詔追諡曰成顯仰文穆王第十  
三子也母周氏  
仰性嚴急善騎射通儒術能書寫及爲郡吏民畏服  
性雖嚴急而政事寬簡有異政無私曲而民畏愛終  
年二十四秋八月敕遣閣門使曹彬賜王兵甲旗幟等是

月乙巳王遷於思政堂是月南漢主殂子鋹嗣

己未六年春二月王遣丞相元德昭寧國軍節度使吳  
延福入貢京師夏四月駕親征幽并是月敕陞湖州  
爲宣德軍授王兄宏傑特進檢校太尉充本軍節度  
使五月熒惑守心六月周世宗崩少主卽位秋八月  
制加王食邑一千戶實封四百戶仍改賜崇仁昭德  
宣忠保慶扶天翊亮功臣又敕王元妃孫氏爲吳越  
國賢德夫人王世子惟濬爲鎮海鎮東等軍節度副  
使檢校太保冬十月王重建功臣堂

庚申建隆元年春正月癸巳今大宋皇帝受禪大赦改

元封周少主為梁王敕遣使來宣諭二月王但用今

名避廟諱也三月建大慶堂成王舊邸也堂廣寬高大凡一百

開奠然新之王命新勒碑文以紀其事夏四月敕授王天下兵馬大元

帥加食邑一千戶實封五百戶五月昭義軍節度使

李筠叛是月車駕親征六月敕加吳越國賢德夫人

孫氏為賢德順穆夫人又授兩軍節度副使王世子

惟濬金紫光祿大夫檢校太保充節度使又敕陞明

州為奉國軍授王弟宏億金紫光祿大夫檢校太保

充本軍節度使秋七月潞州平敕遣通事舍人武懷

節來宣諭九月揚州節度使李重進叛車駕東征于

以寧國軍節度王舅吳延福等有罪竝除名配外郡

延福等兄弟五人俱有異圖左右將校勸王誅之王曰吾以先太夫人同氣之故安忍置之於法言訖遂

鳴咽垂涕眾皆稱賀於是黜延福等於外郡以全吳氏之族是月王遣上直都指

揮使孫承祐率師至潤以迎應之冬十一月揚州平

敕遣通事舍人王繼筠丁德裕來宣諭仍賜國信是

月又敕遣西上閣門副使武懷節來宣諭王命衢州

刺史從弟宏信入貢自太祖革命王有貢奉即加常

數太祖禮之亦異於常十二月駕還京是月王遷於

功臣堂

辛酉二年春二月江南國主李景遷國於豫章三月敕



遣使丁德裕送王第宏信回仍賜王戰馬二百匹羊  
五百口騾二十頭夏六月豫章李景殂子煜嗣位於  
金陵秋七月昭憲皇后遣使來宣告境內自五月至  
是月不雨王命取龍湫於天台山以祈雨九月始權  
酤冬十二月王命弟宏信復爲衢州刺史

壬戌三年春二月敕遣右殿直王著來宣諭仍賜國信  
夏五月東陽信安新定三郡民災王遣使賑卹秋七  
月大風拔木八月泉州畱從効爲大將張漢思所弑  
漢思自稱權知清源軍事九月庚戌夜本境地地震響  
如雷冬十月敕遣上殿直景德倫授兩鎮節度王世

子惟濬爲邕州建武軍節度使是月敕遣西上閣門  
副使武懷節至朝廷以泉州張漢思不稟朝命俾王  
責之翊日王遣使往責之漢思遂從命焉

癸亥四年春三月朔日有蝕之是月王師盡取荆湘之

地初衡州刺史張文表侵湖南朝廷  
援之遂執文表及班師因取二地荆帥高繼沖潭

帥周保權竝入於京師夏四月泉州張漢思爲西門  
指揮使陳洪進所幽洪進歸命於王王請命於朝遂  
授洪進平海軍節度使檢校太傅秋九月重建天寵  
堂是月王閱樓艦於西湖賜內外將校服帶有差冬  
十月獲巨魚於江孺長九丈六尺十一月太祖有事

南郊大赦改元乾德敕遣引進使丁德裕來宣諭仍加王食邑一千戶實封四百戶改賜承家保國宣德守道忠貞恭順功臣又加建武軍節度使王世子惟濬檢校太尉十二月孝明皇后崩敕遣使來宣告是月王命姪昱入貢是月王命姪郁為秀州刺史

甲乾德二年春正月大雨震電二月朔日有蝕之三月制王落起復天下兵馬都元帥加食邑一千戶實封四百戶夏四月重建城南寶塔寺成鑄武肅王文穆王忠獻王銅容供於寺秋八月王命迎釋迦佛像歸於塔所是月王駕復天寵堂謂丞相已下曰頃以

寡德遂貽災釁曾未十年中外如斯實宗廟之休爾等之力然作之者勞吾不敢忘更賴爾等以副不逮丞相已下咸稱大慶冬十一月王師伐蜀王命親從都指揮使行軍司馬孫承祐等率師會焉

丑三年春正月西川平蜀主孟昶入於京師二月朔日有蝕之王命姪台州刺史昱入賀秋七月有虎出於龍山凡傷數十人捕之數旬而獲八月重建寶塔寺於城北是月敕遣通事舍人張延通來宣諭仍賜生辰禮物甲寅吳越國丞相吳程卒追諡曰忠烈

程字正臣山陰人也祖可信定州虞唐縣令父蛻大順中登進士解褐榜官鎮東軍節度掌書記右拾遺累官

禮部尚書程起家校書郎武肅王承制累授檢校戶部員外郎長興初王女將選婚於士族乃以孟榮于葆暨程等三人見於王庭肅王熟視程乃選之起家校書郎遷檢校金部郎中借金紫武肅王以程有吏術因命提舉諸司公事文穆王襲國奏授程為職方郎中觀察支使節度判官天福中文穆王遣程尋典睦州命程知睦州事忠獻王以程判西府院事尋拜丞相福州李孺贊伏誅授程威武軍節度使乾祐三年淮人侵福州授甲於將卒而將卒充溢庭庶紛然不可遏程因登檻瞋目叱之眾皆股慄自是軍政嚴肅程始在東越以父蔭不事苦學有謂程曰觀子骨法不與羣儒類但恨他日登將相不長談論耳程遂勤學文穆王時有西府院官滕馮嘗夢程化為赤龍望南方而去馮因語其夢於人曰吳氏子孫非我所測也及為福州始驗其兆尋以國用繁廣乃命程兼掌屯田權酷事乾德初程夢一羽人布策於前曰冬計子之算而所遺者三果三載而卒年七十三歲冬十一月王命從叔前知福州彰武軍事元瓚為睦州

刺史姪昱復為台州刺史

丙寅四年春二月宣德軍節度使同平章事王兄宏堪

卒追諡曰恭義堪字惠達文穆王第八子也母陳氏起家內衙諸軍都知兵馬使檢校司

空年十八出為湖州刺史有妖巫登衙門大樹恣為

鬼神語州人皆驚畏堪曰妖由人興乃命注弩而射

之巫果請命因鞭之州人咸服堪明吏術能為詩頗

有奇句王嗣位恭敬尤篤顯德中王城災悉以器用

服玩上之累奏授特進檢校太尉宣德軍節度使建

隆初教授同中書門下平章事終年三十八先是大

星隕於西北月餘而隕終焉

丁卯五年春三月五星聚奎如連珠在降婁之次太平之兆也是月建

武軍節度使檢校太尉王子惟濬入貢而還齎賜吳

越國賢德順穆夫人珠翠冠帔等冬十月王又遣元

吳越傳 卷四  
帥府掌書記黃夷簡入貢是月敕遣使至賜王生辰禮物

戊辰六年春正月皇帝郊禋禮畢大赦改元開寶秋七月

北漢主殂養子繼恩嗣九月漢將侯霸榮弒其主

而以繼元嗣是月敕遣使至賜王生辰禮物以下補遺

己巳開寶二年春正月制加王食邑三千戶實封六百

戶是月遼主明扈嗣位秋八月敕遣使至賜王生辰

禮物并御衣紅袍一副金鎖甲一副及駝馬一百頭

庚午三年春三月王親享五廟秋九月王遣子惟濬入

貢是月詔王出師伐富州王將起師尋以路遠詔止

之

辛未四年秋九月敕遣使賜王生辰禮物衣冠劍佩等

冬十一月皇帝南郊制加王食邑二千戶實封六百

戶仍改賜開吳鎮海崇文耀武宣德守道功臣

壬申五年春三月建武軍節度使檢校太尉王世子惟

濬貢奉歸又齋賜吳越國賢德順穆夫人珠翠冠帔

各一副秋九月王遣元帥府掌書記黃夷簡入貢太

祖謂夷簡曰汝歸語元帥當訓練兵甲江南倔強不

來朝我將討之元帥當助我無信人言唇亡齒寒王

密表謝且請師期冬十月王親享五廟復謁寶塔寺

拜先王銅容十二月彰武軍節度使睦州刺史王叔

元瓚卒

瓚少強直好詩學武及長從征有功屢授是任凡在王麾下畏服嚴明無有敢犯者處兄弟雖各守郡軍中未嘗有相逆詐待文穆及王亦盡臣禮如此上下和睦卒年六十七歲

癸酉六年秋八月敕遣使賜王玉帶一條御衣一襲及

生辰禮物冬十一月二日大雪雪氣如煙

甲戌七年夏五月敕遣進奏使錢文贄賜王襲衣玉帶

玉鞍勒馬各一事金器二百兩銀器三千兩錦繡一

千段秋七月敕詔王取常州

詔曰敕錢 朕統御萬邦撫臨兆庶推至誠而待

物期率土以歸心布惠行仁是子本志興師動眾

非我願為惟彼江南言修臣禮久被撫綏之化頗

傾依附之心貢封章則惟見恭勤修外貌則多從

減降既云事大每欲包荒甘言嘗信其赤心內稔

豈疑其奸計而又疊傾誠款願降冊封既禮分之

未虧故我心之無閒使人頻至詞旨逾專是以特

降近臣俾其略來赴闕頒宣優厚恩禮殊隆何期

終日包藏一旦彰露不惟多方託故懇避來朝而

乃修葺城池選練軍旅教習戰陣抽點鄉兵為捍

拒之計謀作攻守之準備朝廷養寇垂二十年心

狠貌恭突然自敗向展為臣之禮適茲觀釁之方

每云傾輸盡彰狡詐既行問罪須至興師今者禁  
衛出兵雲臺選將尅期攻取直抵昇州卿任重統  
戎心專盪寇況早者曾披章奏具述事宜今驗姦  
兇果符陳請開茲討伐必罄忠勤今俟丁德裕到  
彼住三五日可部領軍士起發且往攻常州毗倚  
之懷寤寐無已故茲詔示想宜知悉

是月王密遣行軍司馬孫承祐入奏機事九月孫承  
祐自朝京齎密詔回師期定矣王即日命境內訓練  
士卒揀閱兵甲是月敕遣內客使丁德裕賜王生辰  
禮物冬十月敕授王東南面招討制置使仍賜御劍

一口御甲一副金鞍御馬一匹仍命丁德裕爲行營  
兵馬都監又以雲騎雄捷等指揮步兵凡千人輔王  
進攻常州是月庚申王親率鎮國鎮武親從上直等  
都指揮使王諤等五萬餘人發自國城丁德裕爲先  
鋒使是日天氣晴和風色便順癸亥師次嘉禾有氣  
黑色形如覆舟當行府之上占者曰王氣也丙寅王  
率諸軍入毗陵前鋒所至賊望風而遁有獲巨龜於  
旌門之下占者曰一武之應也戊辰王次毗陵遂克  
關城常人以牙城自守王命營於九仙墩命親從指  
揮使凌超等分營四門命鎮國都指揮使王諤攻江

陰鎮武都指揮使金彥滔攻宐興竝率水艦由吳興  
出太湖而進十一月詔遣弓箭庫使王文寶來宣諭  
仍賜湯藥以金盒盛封至是月王遷行府於賊城南  
門金彥滔克宐興獲其令尉等官士卒凡二百五十  
人馬八十匹王卽命金彥滔獻於京師十二月癸亥  
王親率軍將攻拔呂城寨殺賊軍二千餘人生擒六  
百餘人辛未又敗賊萬餘人於城北金陵大將盧絳  
宵遁先是城中旣危金陵遣大將盧絳率  
萬人來救至是敗之盧絳僅以身免翌日王命  
鈐轄使沈承禮等竝告於京師

乙亥八年春二月詔遣內直使陳理來宣諭仍以戎服

五萬副賜王軍卒又賜王將帥服帶器帛有差是月  
王親帥大軍攻其壘不克夏四月我師復大攻城壘  
時僞知常州軍州事禹萬誠遣觀察使推官鄭簡降  
款於軍門且請命焉王從其請禹萬誠等詣行府待  
罪王賜衣冠器幣等悉送於京師以請命又命羊酒  
置其家以安慰之一日江陰寧遠等軍沿江石橋等  
寨軍兵來降王悉宥之是月敕遣使來宣諭授王守  
太師尙書令加食邑六千戶實封九百戶仍賜湯藥  
及沿身法物等五月詔客省使丁德裕權知常州仍  
又敕遣上侍禁李輝賜王襲衣玉帶玉鞍勒馬各一

事金器二千兩銀器一萬兩錦綵一萬段詔王歸國  
是月王遣兩浙諸軍都鈐轄使沈承禮等攻金陵仍  
表上之詔書褒獎焉

先是毗陵來降士卒凡三千餘人至是悉分還本部

冬十

一月我師克金陵偽主李煜出降

是日冬至軍中皆會飲承禮謂諸將

上曰城中以我節序必有燕享備我怠矣我當直出其不意以圖之乃召勇敢士卒以火攻焚其城及城陷其東門士則賈勇攀壘以上我師觀之遂復攻其南而李煜危迫遂出降焉是月王乃表

賀之王復遣大將孫承祐上表請入覲十二月王克金陵有功敕遣東頭供奉官徐靖齋賜王綵錦八對御衣一副金盃一頂金甲一副御酒一百瓶馳馬三百匹仍賜御劄一通褒焉又賜王麾下孫承祐為平

江軍節度使沈承禮為寧海軍節度使又賜為防禦使者三人為刺史者六人賞克金陵之功也是月詔許王入覲焉

敕錢 省所差鎮東軍支使王通今月二十八日走馬到闕奏今月十五日偽命知常州禹萬誠等歸附已安撫城中事具悉卿位高王霸天付將材門專衛社之勳世著勤王之節一昨親提銳旅取彼堅城勢孤而既絕援兵力盡而遂輸降款遠歷寒暄之候遂成克復之功永增史冊之光輝實協君親之任委其為嘉賞不捨寐興故茲獎諭想宜



知悉

丙子九年春正月庚申王發自國城先是太祖皇帝因

王入覲敕遣供奉官張福貴淮南轉運使彭城德言開

古河一道自瓜洲口至潤州江口達龍舟堰以待王

舟楫其堰遂名曰大通堰又於京城之南敕建大第連亘數坊

棟宇宏麗儲峙什物供帳之類皆供御賜名曰禮賢

宅以俟王駐節焉二月辛丑王次寶應敕遣引進使

翟守素至賜王湯藥以金盒盛之又賜金鞍轡馬二

匹仍押御廚儀鑾翰林皆至焉甲辰王次泗州敕遣

內臣至賜馬三百匹駝一百頭以載行李辛亥又遣

內司賓泊內臣至賜王夫人孫氏湯藥二金盒法酒

五十瓶茶果五十合是日次近畿皇帝詔山南東道

節度使興元尹皇子秦王德昭迎勞仍賜法酒一百

瓶果子一百盒翌日王至京師詔興元尹賜宴於迎

春苑尋詔王居禮賢宅竝以賜焉王未至之先太祖

親幸其宅閱視恩禮如此戊午王朝見於崇德殿進

賀平江南及允朝覲表貢奉犀玉帶及寶玉金器五

千餘事上酒一千瓶遂賜宴於長春殿席就幄次賜

金照匣金沙羅及瓶盤等皆御物也己未王進謝詔

宴於後苑丙寅駕幸禮賢宅賜金二千兩銀三萬兩

絹二萬疋又賜王世子建武軍節度使惟濬及陪臣  
通儒學士崔仁冀等絹帛有差是日王遣世子又進  
通犀帶二條金玉寶器五千事三月制賜王劍履上  
殿詔書不名進封王夫人孫氏爲吳越國王妃封王  
女爲彭城郡君仍詔內臣賜王妃湯藥法酒茶果等  
五百餘事翌日宰臣上言異姓諸侯王無封妻爲妃  
之典上曰行自我朝蓋旌忠賢何必古也時又詔王  
宴於苑中獨太宗秦王侍坐酒酣上命與太宗秦王  
敘昆仲之禮王叩頭陳讓再四翌日太祖將幸洛陽  
詔王歸國王懇請隨駕詔不許惟畱王子惟濬從行

是月王奉辭詔遣賜金器二千兩銀器一萬兩銀三  
萬兩對衣玉束帶玉鞍轡御馬一匹細馬五匹綾羅  
段錦共八萬疋戎裝器八百事散馬一百匹衙隊腰  
帶絡縫衫等二千事又賜王麾下將帥等官錢帛有  
差太祖謂王曰南北風土炎暑不同宜加調護卿可  
早歸又親賜密封黃綾包袱一封謂曰卿至途中宜  
密視之王涕泣進言願三歲一朝上曰川陸迂遠當  
俟我詔旨卽來次日王妃入辭中宮賜金器三百兩  
衣著二千疋銀二千兩是月甲戌王離京師詔秦王  
賜宴於迎春院敕遣引進使翟守素押翰林御廚儀

鑾送至睢陽次日又遣入內小底承驛至賜王湯藥  
二金盒王妃湯藥一金盒戊子王在舟中再拜密開

所賜黃袱視之俱是羣臣乞畱王章疏也王既入朝文武羣臣

屢上疏諫乞畱王在朝免歸國恐王有異圖太祖知王忠厚謹慎小心畏敬固不允及王起行時密以賜焉太祖寬宏大度

恩禮愈深如此夏四月丙辰王至自國城丙寅王

命子惟治詣闕謝恩即日王視事移座於東偏謂左

右曰西北者神京所在天威不遠顏咫尺豈敢寧居

乎五月太祖郊畢制加王食邑三千戶實封一千戶

秋八月敕遣進奏使任知杲至賜國信及生辰禮物

冬十月太祖宴駕太宗即位大赦改元太平興國敕

詔以封命敕王以廷美為開封尹封齊王德昭為武

功郡王德芳為興元尹又敕遣侍御史雷德驥來告

哀王率府僚將校等發哀王二日不食十一日不視

事十一月王遣元帥府衙內都指揮使王子惟渲齋

通天犀帶一條金器五百事玳瑁器五百事塗金銀

香龍等巨萬詣闕以為賀禮是月敕遣樞密都承旨

武珍制加王食邑五千戶實封一千戶仍賜龜魚寶

帶襲衣等是月 日吳越國王妃孫氏薨

丁丑太平興國二年春二月敕遣給事中程羽來歸王

妃之贈諡王妃曰 夏五月王下令以文軌大同

封疆無患凡百禦敵之制悉命除之境内諸州城有白露屋及防城物亦令撤去之秋八月詔遣翰林學士都承旨李昉賜王生辰禮物是月王遣兩軍節度使世子惟濬入朝修覲禮也

戊寅三年春二月六日王發國城三月二日次揚州敕

遣閤門使梁迥內班閤承翰來賜王湯藥茶酒及押諸司官迎接七日次洪澤驛敕遣供奉官李思彥至賜王湯藥一金盒玉鞍轡馬一匹散馬三十匹玳瑁戎毛暖衣等物及賜從行將校有差十五日王次宿州又遣入內小底副行首蔡守恩齋詔至仍賜王龍

茶三觔以金盒盛之御酒二十瓶荔枝鵝梨石榴共六百顆以銀裝籠子盛封十七日王次永城時太宗敕遣王世子兩軍節度使惟濬迎候以內班李神祐領翰林儀鑾御廚諸司隨世子至賜御筵一席是日王遣平江節度使孫承祐先齋表詣闕陳謝是月二十三日王次陳畱孫承祐復自京至傳宣撫問二更閤門使梁迥又至復傳宣撫問二十四日王至京師敕詔皇太弟開封尹廷美賜宴於迎春苑仍遣賜王對衣八事玉排方腰帶金器一千兩銀器一萬兩細衣三千疋玉鞍轡馬一匹是日王安居於禮賢宅二

十六日朝見於崇德殿謝恩及謝差親王迎接賜宴於長春殿王進上法酒五百瓶金銀器物三千兩綾錦一萬龍鳳香等二萬翌日遣使賜王生料羊二百口法酒三百瓶粳米二百石雜買錢一萬緡草料柴炭稱是又賜從行將校等官錢三萬緡二十九日遣內司賓來賜果子三十盒法酒一百瓶蒸羊食物等十匱三十日詔王宴於後苑王復進寶玉金銀酒器等三千兩通犀帶一條龍鳳龜魚帶六事時太宗命射每中的者卽進金銀器三百兩太宗中的者六夏四月八日詔王宴於崇德殿二十三日宴王於後苑

二十六日詔王宴於南郊御莊王又上酒器金銀器皿等共二千餘兩王酒酣至暮而歸第次日遣內司賓賜王御衣紅袍一副綵衣六事實帶一條金銀酒器三千兩細馬四匹御馬一匹儀鑾一副是日王進拜表謝恩仍請以吳越封疆歸於有司

曰伏有懇誠貯於肺腑幸因入覲輒敢上言蓋虞神道之害盈必冀天時之從欲臣近蒙賜以劔履上殿詔書不名仍以本道領募卒徒嘗營戈甲特建國王之號俾增師律之嚴皆所以假其寵名詫於鄰敵方今幅員無外名數洞分豈可冒居自羅

公議合從省罷以正等威除本道軍士甲器已曾  
奏納外所有封吳越國王及天下兵馬大元帥職  
名竝乞解罷凡頒詔命悉願名呼庶聖朝無虛授  
之恩微臣免疾顛之禍

優詔不允五月三日遣內使賜王湯藥四金盒金器  
二百兩銀三千兩次日王再上言

曰臣慶遇承平之運遠修肆覲之儀宸眷彌隆寵  
章皆極斗筭之量實覺滿盈丹赤之誠輒茲披露  
臣伏念祖世以來親提義旅尊戴中京略有兩浙  
之土田討平四方之僭逆此際蓋隔朝天之路莫

諧請吏之心然而稟號令於闕廷保封疆於邊徼  
家世承襲已及百年今者幸遇皇帝陛下嗣守不  
基削平諸夏凡在幅員之內悉歸輿地之圖獨臣  
一邦僻在江表職貢雖陳於外府版籍未歸於有  
司尙令吳越之民猶隔陶唐之化太陽委照不及  
蔀家春雷發聲尙爲龔俗則臣實使之然也罪莫  
大焉不勝大願願以所部十三州獻於下執事其  
閒地里名數別具條析以聞伏望陛下念奕世之  
忠勤察乃心之傾向特降明詔允茲至誠

是月六日乃下詔

吳越傳  
卷四  
詔曰卿世濟忠貞志遵憲度承百年之堂構有千里之江山自朕纂臨來修覲禮觀文物之全盛嘉書軌之混同願親日月之光遠忘江海之志甲兵艘艫既悉上於有司山川土田又盡獻於天府舉宗效順前代所無書之簡編永彰忠烈所請宜依於是所部州十三縣八十六戶五十五萬七百兵一十一萬五千暨民籍倉庫盡獻於朝帝御崇元殿受之是日王麾下將佐軍校聞之皆慟哭曰吾王不歸矣敕陞揚州爲淮海國制王依前守太師尚書令兼中書令改封王爲淮海國王食邑一萬戶實封一千戶充天下兵馬大元帥仍

改賜寧淮鎮海崇文耀武宣德守道功臣以王弟宏儀爲觀察使宏信爲觀察使又以兩鎮節度檢校太尉兼侍中王世子惟濬爲淮南節度使惟治爲節度使十三日賜王淮海國王金印一面仍賜禮賢宅爲永業十五日又授王子惟演惟灝及未官者子弟并麾下將校孫承祐沈承禮竝爲節度使等官有差又賜賓幕宰相而下拜官者又二千五百人二十三日詔王宴於長春殿至暮歸第六月四日詔王宴於後苑命世子惟濬侍坐泛舟於宮池十五日遣入內小底賜王湯藥四金盒對衣四事八寶玉帶二條法酒

一百瓶二十四日詔王宴於御莊秋七月命京城張燈於王宅第前後賜設燈山陳聲樂以寵之十八日詔王宴於崇德殿命王世子惟濬侍坐焉二十六日遣使至王第慰問仍賜茶藥一金盒八月六日詔王總麻以上親竝赴闕授以官爵九日命以杭州伶人馬迎恩等四十五人賜王俾旦夕宴樂有差十四日詔王宴於後苑泛遊宮池二十四日遣內使賜王生辰禮物九月九日詔王大宴於長春殿歡樂終日二十日王忽染風疾太宗傳宣旦夕遣使撫問二十五日又遣內司賓賜王茶果湯藥等冬十月七日王進

朝謝賜宴於後苑十一月朔太宗南郊禮畢詔加王食邑二千戶實封一百戶十二月八日遣使賜王蒸羊食物茶果等共十二匱法酒一百瓶二十五日詔王宴於長春殿至暮歸第時輟御前二大燭送焉

己卯四年春二月朔日王進朝賀大宴於苑中太宗顧王甚厚飲必命醕王大醉及罷拜不能興太宗仍以金裝擔子送王歸第仍以賜之是月車駕征太原王請從行翌日詔中使別押諸司供帳御廚從王太宗每旦夕傳宣撫諭錫賚殆無虛日王小心謹慎每晨趨行闕必先至宮門假寢以待旦一日夜漏四鼓清



蹕啓行時風雨大作諸節鎮無一人至者太宗見王與世子惟濬稱歎久之謂王曰卿以中年宜避風冷自今入見不須太早仍輟御前四大燭賜焉又召王旦夕宴飲一日中頓賜王從官酒食及賜衛士羊肩卮酒觀其飲啖太宗見其雄壯因顧王王進曰正所謂如虎如貔如熊如羆上大悅翌日會劉繼元降上御連城臺誅軍中先亾命於太原者時大臣皆侍坐太宗顧謂王曰卿能保全一方以歸於我兵不血刃深可嘉也王稽顙陳謝仍賜紅袍一副玉鞍轡馬一匹又賜世子惟濬細馬一匹綵衣一副秋七月車駕

凱旋大行封賞中書進擬加王食邑一萬戶實封一千戶以麻卷入御筆改增加王二萬戶實封二千戶是月二十六日王進朝賀進金銀器三千兩錦綺二百疋即宴王於苑中又命王世子惟濬侍坐八月二十四日遣中使賜王生辰禮物冬十月六日遣內使賜王法酒二百瓶御食八匱十一月十二日宴王於長春殿十二月十九日詔王宴於崇德殿酒酣至暮歸第

庚辰五年春正月太宗御朝元殿受朝賀時王以劔履升殿觀者榮之三月清明節太宗召王御大明殿乘

馬擊毬凡五籌仍以毬杖引毬以授王俾王擊之是日宴於殿廡飲必唱籌顧謂王曰卿中年宜以此娛況今清明令節宜加衛護王稽顙陳謝夏四月一日王以風疾告假遣御醫中使一日三至第仍賜湯藥茶果閒日一至其恩禮如此六月三日車駕親幸禮賢宅撫慰再四仍賜金器一千兩錢一萬索銀一萬兩綾絹一萬疋王遣子惟治進謝秋八月十一日車駕又臨撫慰親賜湯藥二金盒二十三日遣中使賜王生辰禮物九月十一日王進朝謝於崇德殿復上金裝定器二千事水晶瑪瑙寶裝器皿二千事珊瑚

樹一株冬十月二十一日詔王宴於朝元殿至暮又以金裝肩輿送王歸第仍以賜焉又以御前二大燭前導十一月戊午駕幸大名府王請從駕詔許賜王肩舁從行七日太宗獵於城之東時風寒頗嚴令中使傳宣俾王先回是月二十日車駕還京

辛巳六年春正月王風恙復作遣尙醫中使絡繹而至自是賜王免朝二月太宗南郊禮畢制加王食邑一萬戶實封一千戶夏五月王尙在風疾遣中使以紫白水晶碁子盛以金合襍寶文楸碁枰賜王且諭云朕萬機之暇頗曾畱意卿疾未痊宜用此自怡一日

內臣趙海嘗被酒詣王府第將吏以爲傳詔者亟稟於王卽進寢室見之海因問王疾恙何如王曰足疾已久沉痾今又加之風眩海探懷中出藥百粒以奉王時王方命茶盡餌之諸子孫及左右惶懼憂駭計無所出海旣去家人皆泣蓋有所疑也王笑曰主上待我甚厚中貴必良藥也翌日太宗聞之大驚卽遣中使撫慰乃杖海脊二十桎梏坐海於王第門者三日然後流於海島王遣世子惟濬陳謝太宗撫問久之又賜湯藥一金盒六月十一日王復貢黃金三千兩白金二萬兩秋八月二十四日遣內使賜王生辰

禮物翌日駕幸禮賢宅王疾尙未痊出迎拜不能興太宗親曳之撫問再四王侍坐賜茶太宗仍賜細茶果二十盒祛風法酒二十瓶又賜王子以下絹帛有差冬十月一日王朝謝於文德殿太宗大悅攜手撫問良久遂賜宴於長春殿謂王曰卿恙稍可天氣嚴寒宜避風冷自後免入朝王稽顙陳謝十二月三日遣中使賜獸炭一千擔柴米稱是

壬午七年春三月太宗貶秦王廷美爲西京畱守夏四月王風疾復發太宗遣中使慰問賜王湯藥一金盒又遣入內小底以龍鳳簫笛娛王終日秋八月二十

四日遣中使賜王生辰禮物翌日王遣子惟灝進謝  
貢金銀器皿五千兩冬十二月朔日有蝕之

癸未八年春正月十三日遣中使賜王珍珠寶燈一座  
仍命坊市張燈於王第前後俾王怡悅三月三日詔  
加王食邑二千戶實封五百戶夏五月遣內使賜王  
珍珠黃羅傘一龍香涼茶二十觔秋八月二十三日  
遣使賜王生辰禮物翌日王遣世子惟濬貢上白龍  
腦香一百觔金銀陶器五百事銀二萬兩黃金一千  
兩冬十一月王以天下無事兵革偃息乃讓大元帥  
及國封表上但許罷兵柄其國封如故仍加王食邑

三千戶實封五百戶十二月六日遣中使賜御筵一  
席以儀鑾迎送王第近代無比

甲申雍熙元年春二月二日上幸太乙宮路由禮賢宅  
王力疾出見於道旁上駐輦撫諭至於再三及駕還  
命取他路還遣中使諭王恐煩迎接徑由他路歸矣  
太宗寵愛愈隆夏四月十三日遣中使賜湯藥二金  
盒秋八月二十三日遣中使賜王生辰禮物冬十月  
華山陳搏號希夷先生謁王王問先生得養生一默  
之道搏曰山野之人何知神仙黃白之術也十二月  
十一日太宗郊禋禮畢進封王爲漢南國王加食邑

二千戶實封四百戶仍改賜寧海鎮國崇文耀武宣  
德守道功臣

乙酉二年春正月太宗以王善於草隸遣中使取王草  
書筆迹王以風恙手不能握筆命將往時所書絹圖  
草字遣世子惟濬同中使以進下詔獎諭仍賜金匣  
玉硯一副龍鳳墨一百挺紅綠筆一千管盈丈紙二  
百軸細白絹三百疋幕府宰相泊朝中大臣文士撰  
恩賜漢南王金匣玉硯詩文進上觀覽命黃絹圖本  
遣使賜王夏四月召王宴於後苑帝曰春氣暄和萬  
物暢茂四海安寧朕當以天下之樂爲樂宐令賞花

賦詩也五月駕幸禮賢宅撫慰久之又命王取平日

所書隸書觀看太宗大悅收取數幅翌日遣中使賜

王御筆二百枝龍墨二十挺紅袍一副秋八月二十

三日遣中使賜王生辰禮物九月九日召王扶疾宴

於崇德殿是日楚王元佐廢爲庶人

元佐太宗長子也聰敏鍾愛之

因力救秦王廷美貶不解遂發狂會重九宴諸王元

佐疾未差不預召遂患日是棄我也乃夜縱火燒其

宮太宗怒冬十月遣內使賜王夫人龍鳳珠冠一頂

金三百兩銀二千兩十一月十五日遣中使賜王幕

府將校幣帛又加授王子惟治等九人官爵有差

丙戌三年春二月太宗以王疾未痊詔免入朝改封南

陽國王仍賜領南陽節鉞加食邑二千戶實封一千戶麻降王復抗表陳讓國事表四上夏四月王將赴南陽詔免入辭賜御衣一副襲衣玉束帶一條金器一千兩玉石器皿一百事銀器一萬兩仍詔山南東道節度使惟濬送王至尉氏縣詔雍州團練使王子惟渲韶州刺史王子惟灝竝從王行是月二十六日王發京師詔遣中使賜御酒二百瓶龍茶二百觔櫻桃二金盒仍遣中使押翰林儀鑾御廚送王五月王遣子惟灝詣闕謝恩貢上熬山寶樹一座紫金絲帶一條金銀器皿共一萬兩太宗撫問再四六月太宗

命韶州刺史王子惟灝歸加王食邑五千戶實封三百戶仍賜國信湯藥二金盒各重六十兩茶餅二十匱寶帶一條金器一千兩銀裝器皿稱是又賜王子惟灝銀二百兩秋八月王不康敕遣東頭供奉官高品尙醫李密并王孫相繼而至又遣中使王首宿至賜王生辰禮物仍令撫問冬十月王拜表謝賀  
丁亥四年春二月敕遣給事中崔灝改封王爲許王加食邑一萬戶實封二千戶仍改賜安時鎮國崇文耀武宣德守道功臣

戊子端拱元年春正月太宗親耕籍田大赦改元二月

先起行身 卷四  
三  
敕遣中使進王爲鄧王加食邑一萬戶實封三千戶  
三月王遣子惟治表賀貢上金飾玳瑁器皿五百事  
玉器二十事水晶盤四事金二千兩銀二萬兩錦綺  
二萬疋羊二百口法酒二百瓶以爲賀夏四月太宗  
命王子惟治歸賜王御羅袍一副玉帶一條瑪瑙嵌  
珍珠酒器八對又輟御前金燭臺一對以賜焉秋七  
月王復不康太宗聞之敕遣中使王守文翰林醫官  
王佑洎王諸孫絡繹而至仍又敕遣供奉官詔加王  
食邑三萬戶實封五千戶仍賜撫問及齋御藥盛一  
金盒八月王疾稍痊遣子團練使惟渲詣闕謝恩貢

上黃犀帶一條大玉帶四條金飾酒器一千事黃絹  
草書八幅隸書四幅太宗撫問再四是月敕遣皇城  
使李惠河州團練使王繼恩同王子惟渲賜王生辰  
禮物國信至王扶疾拜命與來使燕接極歡二十三  
日晡時王於寢齋之西軒命左右讀唐書數篇又命  
諸子孫誦詞章詩什數篇未訖忽風恙復作四鼓而  
薨是夕大流星墜於正寢之上元燭滿庭王以天成  
四年八月  
二十四日四鼓而生復以端拱元年八月二  
十四日四鼓而薨以生記薨實治周一甲子卽日王  
繼恩先還京報訃太宗聞之哀悼不已詔廢朝七日  
復敕王繼恩押入內班賈繼勳護喪歸於京師冬十

月二十四日王喪發南陽十一月二十二日至京師  
太宗復發哀詔權窆於城東別墅即日命有司致祭  
翌日遣中使齋御筵一席致獻於王喪次前二十五  
日太宗御文德殿命工部侍郎郭贄追冊爲秦國王  
太常定諡曰忠懿二十八日復遣工部侍郎郭贄致  
祭於喪次十二月十八日遣中使獻茶湯於喪次二  
年春正月丁酉日遣使押翰林儀鑾鹵簿鼓吹葬王  
於河南府洛陽縣賢相里陶公原命大臣以下俱素  
服送三十里仍命有司撰碑文

王任太師尚書令兼中書令在位凡四十年窮極

富貴福履之盛近代無比王性儉素自奉尤薄常  
服大帛之衣帷帳裯褥皆用紫絕食不多味稟性  
謙和未嘗忤物在藩日每有朝廷使至接奉勤厚  
進貢之物製作精妙將遣使必陳列於庭北向焚  
香再拜而遣之忠遜王之廢也國人旣立王時大  
將胡進思因請殺廢王以絕患王謂曰若殺兄而  
代有其位吾不忍也汝若欲行其志吾當避賢路  
進思惶懼而退王慮進思終欲害廢王乃密遣親  
將薛溫守衛不旬餘進思果遣二卒持刃踰垣而  
入廢王闔戶拒之叫呼達於外溫率卒入而斃賊



於庭進思聞之憂懼發疽而死屢有獻此謀者王皆拒之尋奉廢王於越之西寢供給飲食皆與王同廢王嘗於山亭擊鼓聲聞於外守衛者遽以聞王王曰吾兄以閑適爲懷非鼓不樂乃命裝金魚水鼓四面奉之國人聞之感王孝友如此有出涕者由是廢王無幽廢之恨終以疾卒太平興國中趙普再入相盧多遜罷爲兵部尙書一日普召王世子惟濬至謂曰朝廷知盧多遜求取元帥財物極多今未鞫劾者恐累元帥耳請具所遺之物列狀上之惟濬歸而白王王曰主上英明凡大臣有

過卽自行何用狀二惟濬懼普因請賓僚將吏再三堅請曰若不疾言事恐不測王曰汝姑休矣我當取案籍考視之於是盡取當時文帳命火焚之卽召惟濬等至謂曰我入朝之初荷蒙主上非常之遇故左右大臣咸有饋物非獨盧相也豈可見人將溺而加石焉汝等少年慎勿爲此禍福我自當之惟濬等惕懼而退普聞之召惟濬至深自嘆稱曰王寬宏大度事遂寢王崇奉釋氏在國中飯僧億萬建造寺院凡三百所博覽經史在風疾中手不釋卷平生好吟咏在國中編三百餘篇目曰

正本集國相元德昭翰林學士陶穀皆撰集序後  
文僖公搜尋遺墜總集爲十卷撰後序行於世時  
天禧四年文僖公忝機衡之命特詔尊王爲尙父  
王自國初供奉之數無復文案今不得而書惟太  
祖太宗兩朝入貢記之頗備謂之貢奉錄今取其  
大者如赭黃犀帶龍鳳龜魚仙人鰲山寶樹等通  
犀帶凡七十餘條皆希世之寶也玉帶二十四紫  
金獅子帶一黃金九萬五千餘兩銀一百一十萬  
二千餘兩綾羅錦綺二十八萬餘疋色絹七十九  
萬七千餘疋金飾代瑁器一千五百餘事水晶瑪

瑙玉器凡四十餘事珊瑚樹一高三尺五寸金銀  
飾陶器一十四萬餘事金銀飾龍鳳船舫二百艘  
銀裝器械七十萬事白龍瑙二百餘觔王自入朝  
至歸國復入朝太祖太宗所賜金器并金物六萬  
四千七百餘兩銀器四十萬八千八百餘兩玉石  
器皿一萬七千事寶玉帶四十二條錦綺羅紈一  
十六萬六千三百餘疋御衣并袍襲衣等

金盃六頂甲六副金玉鞍轡御馬一十六匹細  
馬四十八匹馳三百餘匹散馬二千七百二十四  
金印四顆玉冊二御劔三口法酒三千餘瓶衙墜

吳越備史卷之四  
腰帶三千事鳳冠四頂羊果稱是

吳越備史卷之四 終

大宋嘉祐元年丙申歲正月七日四代孫朝奉郎守  
尚書刑部郎中集賢殿修撰知梓州軍州事兼管內  
橋道使提舉戎瀘等七州賊盜甲兵專勾當納溪夷  
人公事上護軍賜紫金魚袋錢中孚寫

大宋紹興二年壬子歲六月二十七日七代孫迪功  
郎前河南府儀曹掾錢煥伏觀曾祖修撰所傳吳越  
備史於蔡子發家遂取而歸復藏吾家焉在臨安府  
寶蓮山寺題

服前河... 大宋... 八公... 謝... 尚書... 大宋...

吳越備史四卷原載世系圖表全佚准存十三

州考一篇


欽定四庫提要言之詳矣先大夫有志搜求久而

未得顧果庭姻丈於友人家得影宋抄舊本


悉載無遺甚為詳備亟借錄出重付梨棗用成

全璧庶以承先大夫之志云男洲謹識

存復



天... 王...



歩走傳

